

Мемлекеттік сатып алу туралы

Күшін жойған

Қазақстан Республикасының 2002 жылғы 16 мамырдағы N 321 Заңы. Күші жойылды - Қазақстан Республикасының 2007 жылғы 21 шілдедегі N 303 Заңымен

Ескерту. Күші жойылды - Қазақстан Республикасының 2007.07.21. N 303 (Заң 2008 жылғы 1 қаңтардан бастап қолданысқа енгізіледі) Заңымен.

Осы Заң мемлекеттік органдардың, мемлекеттік мекемелердің, сондай-ақ акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындардың, заңды тұлғалардың және олармен аффилиирленген заңды тұлғалардың өз билігіндегі ақшаны тиімді пайдалану мақсатында өнім берушілерден тауарларды, жұмыстар мен көрсетілетін қызметтерді сатып алуды жүзеге асыру процесінде туындайтын қатынастарды реттейді.

Ескерту. Кіріспеге өзгеріс енгізілді - Қазақстан Республикасының 2004.07.05. N 569 Заңымен .

1-тарау. Жалпы ережелер

1-бап. Осы Заңда пайдаланатын негізгі ұғымдар

Осы Заңда мынадай ұғымдар пайдаланылады:

1) акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындардың, заңды тұлғалардың аффилиирленген тұлғалары - акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындардың, заңды тұлғалардың шешімдерін тура және (немесе) жанама түрде белгілеуге және (немесе) олар қабылдайтын шешімдерге, оның ішінде негізгі ұйымның акцияларын (үлестерін) иелену құқықтарын жүзеге асыруға байланысты шешімдерге, шарттарға ықпал етуге мүмкіндігі бар тұлғалар (акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындардың, заңды тұлғалардың қызметін реттеуді өздеріне берілген өкілеттік шеңберінде жүзеге асыратын мемлекеттік органдарды қоспағанда), сондай-ақ акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындардың, заңды тұлғалардың өзіне қатысты осындай құқығы болатын кез келген тұлға;

2) ықтимал өнім берушінің аффилиирленген тұлғасы - осы ықтимал өнім

беруші қабылдайтын шешімді анықтауға және (немесе) шешімге, оның ішінде шарттың немесе өзге де мәміленің күшіне қарай ықпал етуге тікелей және (немесе) жанама құқығы бар кез келген жеке немесе заңды тұлға, сондай-ақ өзі жөнінде сол ықтимал өнім берушінің осындай құқығы бар кез келген жеке немесе заңды тұлға ;

2-1) мемлекеттік сатып алу саласындағы мемлекеттік монополия - шаруашылық жүргізуді тек қана мемлекеттік органдар және (немесе) мемлекеттік кәсіпорындар Қазақстан Республикасының заң актілері негізінде жүзеге асыратын, сондай-ақ бәсекелестікті енгізу ұлттық қауіпсіздік, құқық тәртібі, мемлекеттің жоғары лауазымды адамдарының қауіпсіздігі, қорғаныс және қорғаныс-өнеркәсіптік кешен мүдделерін қамтамасыз ету тұрғысынан мақсатқа сай болмайтын жағдайларда жүзеге асырылатын қызмет саласы. Мемлекеттік монополия субъектілерінің және осы субъектілер монополиялық жағдайда болатын салалардың тізбесін Қазақстан Республикасының Үкіметі а й қ ы н д а й д ы ;

3) мемлекеттік сатып алу - мемлекеттік органдардың, мемлекеттік мекемелердің, сондай-ақ акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындардың, заңды тұлғалардың және олармен аффилиирленген заңды тұлғалардың өз билігіндегі ақшаның есебінен, осы Заңның 27-1-бабында көзделген жағдайларды қоспағанда, тауарларды, жұмыстар мен көрсетілетін қызметтерді с а т ы п а л у ы ;

3-1) конкурстық өтінімнің демпингтік бағасы - тауарлар, жұмыстар мен көрсетілетін қызметтер белгілі бір тауар рыногында қалыптасқан бағалар деңгейінен едәуір төмен бағамен ұсынылатын, ықтимал өнім берушінің конкурстық өтінімінің бағасы; <*>

4) мемлекеттік сатып алу туралы шарт - осы Заңға және Қазақстан Республикасының өзге де нормативтік құқықтық актілеріне сәйкес тапсырыс беруші мен өнім беруші арасында жасалған азаматтық-құқықтық шарт;

5) тапсырыс беруші - мемлекеттік органдар, мемлекеттік мекемелер, сондай-ақ акцияларының (үлестерінің) елу және одан көбірек проценті немесе акцияларының бақылау пакеті мемлекетке тиесілі мемлекеттік кәсіпорындар, заңды тұлғалар және олармен аффилиирленген заңды тұлғалар. Тапсырыс беруші конкурстың бастамашысы болып табылады;

6) конкурс - тапсырыс берушінің тауарларды, жұмыстар мен көрсетілетін қызметтерді сатып алуына бағытталған және ықтимал өнім берушілер арасында ашық та адал бәсекелестікті қамтамасыз ететін мемлекеттік сатып алуды жүргізу ә д і с і ;

7) конкурстық құжаттама - конкурсты өткізу талаптары мен тәртібі

қамтылатын, конкурстық өтінімді дайындау үшін ықтимал өнім берушіге табыс етілетін құжаттама;

8) конкурстық өтінімді қамтамасыз ету - конкурсқа қатысуға тілек білдірген ықтимал өнім беруші табыс ететін ақша кепілі немесе банк кепілдігі;

9) біртекті тауарлар, жұмыстар мен көрсетілетін қызметтер - бірдей болмаса да, белгілі бір функцияларды орындауына және өзара алмастырушы болуына мүмкіндік беретін ұқсас сипаттамалары бар және ұқсас компоненттерден тұратын тауарлар, жұмыстар мен көрсетілетін қызметтер;

10) конкурсты ұйымдастырушы - тапсырыс беруші немесе осы Заңға сәйкес конкурсты ұйымдастыру және өткізу үшін тапсырыс беруші белгілеген адам;

11) мерзімді баспасөз - Қазақстан Республикасының заңдарында белгіленген тәртіппен уәкілетті орган айқындайтын, өткізілуге дайындалып жатқан және өткізілген мемлекеттік сатып алу туралы мәліметтер жарияланатын мерзімді баспасөз басылымдары;

12) өнім беруші - тапсырыс берушімен мемлекеттік сатып алу туралы жасасқан шартта келісім-шарт жасасушы агент ретінде әрекет ететін жеке немесе заңды (мемлекеттік мекемелерді қоспағанда, егер заң актілерінде өзгеше белгіленбесе) тұлға;

13) ықтимал өнім беруші - мемлекеттік сатып алу туралы шарт жасасу мақсатымен мемлекеттік сатып алу процесіне қатысатын жеке немесе заңды (мемлекеттік мекемелерді қоспағанда, егер заң актілерінде өзгеше белгіленбесе) тұлға;

14) уәкілетті орган - Қазақстан Республикасының Үкіметі белгілейтін, мемлекеттік сатып алу процесін реттеуді жүзеге асыратын мемлекеттік орган.

Ескерту. 1-бапқа өзгеріс енгізілді - Қазақстан Республикасының 2004.07.05. N 569 Заңымен.

2-бап. Қазақстан Республикасының мемлекеттік сатып алу туралы заңдары

1. Қазақстан Республикасының мемлекеттік сатып алу туралы заңдары Қазақстан Республикасының Конституциясына негізделеді, осы Заңнан және Қазақстан Республикасының өзге де нормативтік құқықтық актілерінен тұрады.

2. Егер Қазақстан Республикасы бекіткен халықаралық шартта осы Заңда көзделгеннен өзгеше ережелер белгіленсе, халықаралық шарттың ережелері қолданылады.

3-бап. Мемлекеттік сатып алу процесін құқықтық реттеу принциптері

Мемлекеттік сатып алу процесін құқықтық реттеу:

- 1) сатып алу үшін пайдаланылатын ақшаны оңтайлы және тиімді жұмсау;
- 2) осы Заңда көзделген жағдайларды қоспағанда, барлық ықтимал өнім

- берушілердің мемлекеттік сатып алу процесіне қатысуына тең мүмкіндік беру;
- 3) ықтимал өнім берушілер арасындағы адал бәсекелестік;
 - 4) мемлекеттік сатып алу процесінің жариялылығы принциптеріне негізделеді

4-бап. Мемлекеттік сатып алу процесі

Мемлекеттік сатып алу процесі:

- 1) сатып алынатын тауарлардың, жұмыстар мен көрсетілетін қызметтердің номенклатурасы мен көлемін қалыптастыруды;
- 2) өнім берушіні таңдауды, онымен мемлекеттік сатып алу туралы шарт ж а с а с у д ы ;
- 3) мемлекеттік сатып алу туралы шарттардың орындалуын қамтиды.

5-бап. Уәкілетті органның құзыреті

У ә к і л е т т і о р г а н :

- 1) мемлекеттік сатып алу саласында мемлекеттік саясатты әзірлеуді және іске а с ы р у д ы қ а м т а м а с ы з е т е д і ;
- 2) мемлекеттік сатып алу мәселелері бойынша нормативтік құқықтық актілерді жетілдіру жөніндегі ұсыныстарды қорытады және әзірлейді, сондай-ақ өз құзыреті шегінде Қазақстан Республикасының заңдарына сәйкес нормативтік құқықтық актілер қабылдайды;
- 3) мемлекеттік сатып алу процесін үйлестірілуі мен мониторингін жүзеге а с ы р а д ы ;
- 3-1) тауарларды, жұмыстар мен көрсетілетін қызметтерді өз билігіндегі ақша есебінен сатып алуды Қазақстан Республикасының мемлекеттік сатып алу туралы заңдарына сәйкес жүзеге асыруға міндетті субъектілердің Мемлекеттік тізілімін жүргізуді жүзеге асырады;
- 4) Қазақстан Республикасының мемлекеттік сатып алу туралы заңдарының сақталуын бақылауды жүзеге асырады;
- 5) мемлекеттік сатып алу мәселелері жөніндегі есептіліктің нысанын, оны жасау мен табыс етудің тәртібін әзірлейді;
- 6) әдістемелік материалдарды, үлгілік конкурстық құжаттаманы әзірлейді және бекітеді, мемлекеттік сатып алу мәселелері бойынша конкурстарды ұйымдастырушыларға консультациялық көмек көрсетеді;
- 7) мемлекеттік сатып алу туралы шарт жасасқанға дейін конкурстарды ұйымдастырушылардың, тапсырыс берушілер мен конкурс комиссияларының Қазақстан Республикасының мемлекеттік сатып алу туралы заңдарын бұза отырып қабылдаған шешімдерін қайта қарау немесе олардың күшін жою жөнінде ш е ш і м д е р қ а б ы л д а й д ы ;
- 8) Қазақстан Республикасының мемлекеттік сатып алу туралы заңдары бұзыла отырып жасалған мәмілелерді жарамсыз деп тану жөнінде соттарға талап

6-бап. Мемлекеттік сатып алуға байланысты қызметтегі жариялылық

1. Мемлекеттік құпиялар болып табылатын мәліметтерді қоспағанда, өткізілуге дайындалып жатқан және өткізілген мемлекеттік сатып алу туралы мәліметтерді конкурсты ұйымдастырушы мерзімді баспасөзде жариялайды және Қазақстан Республикасының заңдарында белгіленген нысандар мен мерзімдерде уәкілетті органға табыс етеді.

2. Уәкілетті орган ықтимал өнім берушінің мемлекеттік сатып алу процесіне өзінің қатысуын жоспарлауы үшін мемлекеттік сатып алу туралы ақпаратты мерзімді баспасөзде ұдайы жариялап отырады және (немесе) жалпыға жететін телекоммуникациялық желілерге (Интернет және басқалар) орналастырады.

6-1-бап. Тауарларды, жұмыстар мен көрсетілетін қызметтерді өз билігіндегі ақша есебінен сатып алуды Қазақстан Республикасының мемлекеттік сатып алу туралы заңдарына сәйкес жүзеге асыруға міндетті субъектілердің мемлекеттік тізілімі

Мемлекеттік органдар, мемлекеттік мекемелер, сондай-ақ акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындар, заңды тұлғалар және олармен аффилиирленген заңды тұлғалар тауарларды, жұмыстар мен көрсетілетін қызметтерді өз билігіндегі ақша есебінен сатып алуды Қазақстан Республикасының мемлекеттік сатып алу туралы заңдарына сәйкес жүзеге асыруға міндетті Субъектілердің мемлекеттік тізіліміне енгізілуге тиіс.

Тауарларды, жұмыстар мен көрсетілетін қызметтерді өз билігіндегі ақша есебінен сатып алуды Қазақстан Республикасының мемлекеттік сатып алу туралы заңдарына сәйкес жүзеге асыруға міндетті Субъектілердің мемлекеттік тізіліміне енгізудің және одан шығарудың тәртібін уәкілетті орган белгілейді.

Ескерту. 6-1-баппен толықтырылды - Қазақстан Республикасының 2004.07.05 . N 569 Заңымен .

7-бап. Мемлекеттік сатып алу процесіне байланысты шектеулер

1. Мемлекеттік сатып алу процесіне қатысатын ықтимал өнім берушінің лауазымды немесе сенім білдірген адамының жақын туыстарының (ата-анасы, ерлі-зайыптылар, аға-інісі, апа-сіңлісі, балалары) немесе жекжаттарының (ерлі-зайыптылардың аға-інісі, апа-сіңлісі, ата-анасы және балалары) мемлекеттік сатып алу процесіне байланысты тапсырыс берушінің мүдделерін білдіруге қ ұ қ ы ғ ы ж о қ .

2. Ықтимал өнім берушінің және (немесе) оның конкурстық құжаттаманы

дайындау бойынша тапсырыс берушіге консультациялық қызметтер көрсеткен қызметкерінің көрсетілген консультациялық қызметтерге байланысты тауарларды, жұмыстар мен көрсетілетін қызметтерді мемлекеттік сатып алу жөніндегі конкурсқа қатысуға құқығы жоқ.

3. Ықтимал өнім беруші мен оның аффилирленген тұлғасының бір конкурсқа (лотқа) қатысуға құқығы жоқ.

4. Осы бапта көрсетілген негіздер бойынша конкурстық өтінім қабылданбай тасталған кезде конкурстың қорытындылары туралы хаттамада оның қабылданбау негіздемелері көрсетіледі, олар осы конкурстық өтінімді табыс еткен ықтимал өнім берушіге хабарланады.

8-бап. Ықтимал өнім берушіге қойылатын біліктілік талаптары

1. Мемлекеттік сатып алу процесіне қатысу үшін ықтимал өнім беруші, осы Заңның 20-бабында және 21-бабының 4-тармағында көзделген жағдайларды қоспағанда, мынадай біліктілік талаптарына сәйкес келуге:

1) кәсіптік біліктілігі, сондай-ақ сатып алынатын тауарлардың, жұмыстардың және көрсетілетін қызметтердің тиісті рыногында кемінде бір жыл жұмыс тәжірибесі болуға;

2) мемлекеттік сатып алу туралы шарт бойынша міндеттемелерді орындауға қажетті қаржы, материалдық және еңбек ресурстары болуға;

3) мемлекеттік сатып алу туралы шарт жасасу үшін азаматтық құқық қабілеттілігі болуға;

4) төлем қабілеті болуға, таратылуға жатпауға, оның мүлкіне тыйым салынбаған болуға тиіс, оның қаржы-шаруашылық қызметі Қазақстан Республикасының заңдарына сәйкес тоқтатылып қоймаған болуға тиіс;

5) мемлекеттік сатып алу туралы соңғы екі жыл ішінде жасалған шарттардағы өз міндеттемелерін орындамағаны немесе тиісінше орындамағаны үшін заңды күшіне енген сот шешімінің негізінде жауапқа тартылмаған болуға тиіс.

Сатып алынатын тауарлар, жұмыстар мен көрсетілетін қызметтер рыногындағы жұмыс тәжірибесі болуының қажеттігі туралы талаптар осы Заңның 27-бабына сәйкес шағын кәсіпкерлік субъектілеріне және ықтимал өнім берушілер болып табылатын жағдайларда мүгедектердің қоғамдық бірлестіктерінің ұйымдарына қолданылмайды.

1-1. Мемлекеттік сатып алу жөніндегі конкурстарға кәсіпкерлік қызметпен айналыспайтын ықтимал өнім беруші - жеке тұлғалар өздері осындай ықтимал өнім беруші - жеке тұлғаларға меншік құқығында тиесілі тауарларды тапсырыс берушіге сату мақсатында қатысқан кезде, осы баптың 1-тармағының 3) және 5) тармақшаларында көзделген талаптарды қоспағанда, олардың біліктілік талаптарына сай болуы талап етілмейді.

2. Ықтимал өнім беруші өзінің осы баптың 1-тармағында көзделген біліктілік талаптарына сәйкес келетінін растау үшін конкурсты ұйымдастырушыға аттестаттардың, куәліктердің, патенттердің, лицензиялардың, сертификаттардың, дипломдардың және анықтамалардың көшірмелерін табыс етеді.

Қазақстан Республикасының заң актілерімен міндетті аудит өткізу белгіленген заңды тұлғалар соңғы қаржы жылы үшін аудиторлық есепті де табыс е т е д і .

3. Ықтимал өнім беруші, оған біліктілік талаптары бойынша дұрыс емес ақпарат берілген жағдайда, осындай факт анықталған кезден бастап бір жыл ішінде мемлекеттік сатып алу процесіне қатысуға жіберілмейді.

Табыс етілетін ақпараттың толықтығы мен дұрыстығы конкурстық комиссияның ықтимал өнім берушінің біліктілік талаптарына сәйкестігін растайтын құжаттарын қарауы кезінде анықталады.

Конкурсты ұйымдастырушы конкурстың қорытындылары шығарылған күннен бастап үш жұмыс күнінен кешіктірмей ықтимал өнім берушілердің дәйектемесіз ақпарат ұсынған анықталған барлық фактілері туралы уәкілетті органды хабардар етуге міндетті.

Мемлекеттік органдар, мемлекеттік мекемелер, акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындар, заңды тұлғалар, сондай-ақ олармен аффилиирленген заңды тұлғалар өнім берушілердің мемлекеттік сатып алу туралы жасалған шарттар бойынша міндеттемелерін орындамағаны немесе тиісінше орындамағаны туралы сотқа талап-арыздар ұсынған кезде олардың талап-арыздары қанағаттандырылған жағдайда, олар сот шешімі күшіне енгеннен кейін үш жұмыс күні ішінде уәкілетті органның мекен-жайына белгіленген тәртіппен расталған сот шешімінің көшірмесін жібере отырып, оны хабардар е т у г е м і н д е т т і .

Біліктілік талаптары бойынша дәйектемесіз ақпарат ұсынған ықтимал өнім берушілер туралы, сондай-ақ соңғы екі жыл ішінде мемлекеттік сатып алу туралы жасалған шарттар бойынша міндеттемелерін орындамағаны немесе тиісінше орындамағаны үшін соттың заңды күшіне енген шешімі негізінде жауапқа тартылған ықтимал өнім берушілер туралы ақпарат уәкілетті органның WEB-сайтына орналастырылады.

4. Конкурсты ұйымдастырушының ықтимал өнім берушіге осы Заңда көзделмеген біліктілік талаптарын белгілеуге құқығы жоқ. Ықтимал өнім беруші өзіне қойылатын біліктілік талаптарына жатпайтын ақпаратты табыс етпеуге қ ұ қ ы л ы .

Ескерту. 8-бапқа өзгеріс енгізілді - Қазақстан Республикасының 2004.07.05. N 569 Заңымен .

9-бап. Мемлекеттік сатып алуды жүзеге асыру тәсілдері

1. Мемлекеттік сатып алу мына тәсілдердің бірімен:

1) ашық конкурс;

2) жабық конкурс;

3) баға ұсыныстарын сұратуды пайдалана отырып, өнім берушіні таңдау;

4) бір көзден сатып алу;

5) ашық тауар биржалары арқылы жүзеге асырылады.

2. Ашық және жабық конкурстар екі кезеңді рәсім пайдаланыла отырып өткізілуі мүмкін.

3. Мемлекеттік сатып алуды осы баптың 1-тармағының 1), 2) және 4) тармақшаларында аталған тәсілдермен жүзеге асыру үшін конкурсты ұйымдастырушы конкурстық комиссия құрады.

Мемлекеттік сатып алуды ұйымдастыру мен өткізу, конкурстық комиссияны құру мен оның қызметінің тәртібін, сондай-ақ тауарларды, жұмыстар мен көрсетілетін қызметтерді сатып алудың салалық ерекшеліктерін және солар бойынша шарттар жасасу мерзімдерін Қазақстан Республикасының Үкіметі белгілейді.

4. Мемлекеттік органдар, мемлекеттік мекемелер және қазыналық кәсіпорындар қаржы жоспарын бекіткен күннен бастап он жұмыс күні ішінде мемлекеттік сатып алудың жылдық жоспарын бекітеді, онда сатып алынатын тауарлардың, жұмыстар мен көрсетілетін қызметтердің жоспарланып отырған номенклатурасы мен көлемі, мемлекеттік сатып алуды жүзеге асырудың тәсілі мен мерзімдері көрсетіледі.

Шаруашылық жүргізу құқығындағы мемлекеттік кәсіпорындар, акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі заңды тұлғалар және олармен аффилиирленген заңды тұлғалар жыл сайын, бірінші сәуірден кешіктірмей, бюджеттердің (бизнес-жоспарлардың) негізінде, мемлекеттік сатып алудың жылдық жоспарын бекітеді, онда сатып алынатын тауарлардың, жұмыстар мен көрсетілетін қызметтердің жоспарланып отырған номенклатурасы мен көлемі, мемлекеттік сатып алуды жүзеге асырудың тәсілі мен мерзімдері көрсетіледі.

Тапсырыс беруші мемлекеттік сатып алудың жылдық жоспары бекітілгеннен кейін оны жеті жұмыс күні ішінде уәкілетті органға табыс етеді.

Мемлекеттік сатып алудың жылдық жоспарының нысанын уәкілетті орган бекітеді.

5. Мемлекеттік органдардың, мемлекеттік мекемелер мен қазыналық кәсіпорындардың үздіксіз жұмыс істеуін қамтамасыз ету мақсатында тапсырыс беруші, егер Қазақстан Республикасының заң актілерінде белгіленген мерзімде республикалық бюджет туралы заң немесе мәслихаттың тиісті жылға арналған

жергілікті бюджет туралы шешімі қабылданбаса, Қазақстан Республикасының Үкіметі келесі жылдың бірінші тоқсанына белгілейтін тізбе бойынша ағымдағы жылдың бірінші тоқсанында мемлекеттік сатып алу көлемінен осы шарт бойынша аспайтын көлемде тауарлар, жұмыстар мен көрсетілетін қызметтерді мемлекеттік сатып алу туралы шарттың қолданылуын ұзартуға құқылы.

Қазақстан Республикасының Ұлттық Банкі және Қазақстан Республикасының Ұлттық Банкі бюджетінің қаражаты есебінен қаржыландырылатын мемлекеттік мекемелер олардың үздіксіз жұмыс істеуін қамтамасыз ету мақсатында, егер жаңа қаржы жылының басына қарай Қазақстан Республикасы Ұлттық Банкінің бюджеті бекітілмеген болса, осы баптың 5-тармағының бірінші бөлігіне сәйкес Қазақстан Республикасының Үкіметі айқындайтын тізбе бойынша тауарларды, жұмыстарды және көрсетілетін қызметтерді мемлекеттік сатып алу туралы шарттың қолданылуын ағымдағы жылдың бірінші тоқсанында осы шарт бойынша мемлекеттік сатып алу көлемінен аспайтын көлемде келесі жылдың бірінші тоқсанына ұзартуға да құқылы.

Құрылыстағы ұзақ мерзімді мердігерлік жұмыстарға және оларға ілеспе тауарларға және (немесе) көрсетілетін қызметтерге жасалған шарттар, сондай-ақ әзірленуінің технологиялық мерзімі бір жылдан асатын тауарларды сатып алу туралы шарттар бір жылдан асатын мерзімге жасалуы мүмкін. Мұндай шарттар жасасудың тәртібін Қазақстан Республикасының Үкіметі белгілейді.

6. Мемлекеттік сатып алуды жүзеге асыру тәсілін осы Заңға сәйкес тапсырыс беруші таңдайды.

Ескерту. 9-бапқа өзгеріс енгізілді - Қазақстан Республикасының 2004.07.05. N 569 Заңымен.

2-тарау. МЕМЛЕКЕТТІК САТЫП АЛУДЫ АШЫҚ КОНКУРС ТӘСІЛІМЕН ЖҮЗЕГЕ АСЫРУ

10-бап. Ашық конкурсты ұйымдастыру

1. Осы Заңда сатып алуды жүзеге асырудың өзгеше тәсілі көзделген жағдайларды қоспағанда, ашық конкурс мемлекеттік сатып алуды жүзеге асырудың негізгі тәсілі болып табылады.

2. Конкурсты ұйымдастырушы конкурсты ұйымдастырады және өткізеді.

Тапсырыс беруші бюджет (бизнес-жоспар) бекітілгеннен кейін келесі жылға қажетті және бекітілген бюджетте (бизнес-жоспарда) көзделген тауарларды, жұмыстарды және көрсетілетін қызметтерді мемлекеттік сатып алу жөнінде конкурс өткізу туралы шешім қабылдауға құқылы.

3. Республикалық бюджеттік бағдарламалардың әкімшісі өзіне бағынысты мемлекеттік мекемелер үшін конкурсты ұйымдастырушы ретінде әрекет етуге, сондай-ақ олардың арасынан бірыңғай конкурсты ұйымдастырушыны анықтауға құқылы.

Тапсырыс беруші мемлекеттік орган немесе мемлекеттік мекеме болған жағдайда, басқа мемлекеттік органның немесе мемлекеттік мекеменің конкурсты ұйымдастырушы болып белгіленуі мүмкін.

Тиісті әкімшілік-аумақтық бөліністің әкімі жергілікті бюджеттік бағдарламалардың әкімшілері үшін олардың арасынан бірыңғай конкурсты ұйымдастырушыны белгілеуге құқылы.

Жергілікті бюджеттік бағдарламалардың әкімшісі, тиісті әкімшілік-аумақтық бөлініс әкімінің бірыңғай конкурсты ұйымдастырушыны белгілеуін қоспағанда, тиісті бюджеттердің деңгейлері бойынша өзіне бағынысты мемлекеттік мекемелер үшін конкурсты ұйымдастырушы ретінде әрекет етуге құқылы, сондай-ақ олардың арасынан бірыңғай конкурсты ұйымдастырушыны белгілей алады.

Мемлекеттік кәсіпорындар мен акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі заңды тұлғалар өздерінің аффилиирленген заңды тұлғалары үшін бірыңғай конкурсты ұйымдастырушы ретінде әрекет етуге құқылы, сондай-ақ олардың арасынан бірыңғай конкурсты ұйымдастырушыны белгілеуге құқылы.

Қазақстан Республикасының Ұлттық Банкі мемлекеттік кәсіпорындар және өзі құрылтайшысы (уәкілетті орган) болып табылатын заңды тұлғалар үшін конкурсты ұйымдастырушы ретінде әрекет етуге құқылы.

4. Мемлекеттік органдарға бағынысты мемлекеттік мекемелерден басқа, бірнеше тапсырыс беруші біртекті тауарларды, жұмыстар мен көрсетілетін қызметтерді мемлекеттік сатып алу жөнінде бірыңғай конкурс өткізе алады. Бұл орайда бірыңғай конкурсты ұйымдастырушыны Қазақстан Республикасының **Үкіметі** белгілейді.

Ескерту. 10-бапқа өзгеріс енгізілді - Қазақстан Республикасының 2004.07.05. N 569 Заңымен.

11-бап. Конкурс өткізу туралы хабарландыру (хабарлама)

1. Конкурс өткізу туралы хабарландыруда (хабарлама) мынадай мәліметтер :

- 1) конкурсты ұйымдастырушының атауы мен орналасқан жері;
- 2) жорамалданып отырған мемлекеттік сатып алудың көлемі, атауы және тауарлардың жеткізілу, жұмыстардың орындалу және қызметтердің көрсетілу **орны** ;
- 3) тауарлар жеткізудің, жұмыстар орындаудың, қызметтер көрсетудің талап **етілетін мерзімдері** ;
- 4) конкурстық құжаттама алу орны мен тәсілдері, сондай-ақ оған төлем **жасаудың** **реквизиттері** ;

5) конкурстық өтінімдер табыс етілетін орын мен соңғы мерзімі, сондай-ақ конкурстық өтінімдер салынған конверттер ашылатын орын, күні мен уақыты;

б) конкурсты ұйымдастырушы белгілейтін басқа да қажетті ақпарат болуға
т и і с .

2. Ашық конкурсты өткізу туралы хабарландыру конкурсқа қатысуға өтінімдер қабылдау аяқталған күнге дейін күнтізбелік отыз күннен кешіктірмей мерзімді баспасөзде мемлекеттік тілде және орыс тілінде жариялануға тиіс.

Хабарландырулар бір мезгілде уәкілетті органның WEB-сайтында
ж а р и я л а н у ы м ү м к і н .

Конкурс өтпей қалды деп танылған жағдайда қайтадан ашық конкурс өткізу туралы хабарландыру конкурсқа қатысуға өтінімдер қабылдау аяқталатын күнге дейін күнтізбелік он бес күннен кешіктірілмей мерзімді баспасөзде жариялануға
т и і с .

Ескерту. 11-бапқа өзгеріс енгізілді - Қазақстан Республикасының 2004.07.05. N 569 Заңымен .

12-бап. Конкурстық құжаттаманың мазмұны

1. Конкурсты ұйымдастырушы барлық ықтимал өнім берушіге мынадай
а қ п а р а т :

1) ықтимал өнім беруші өзінің қойылатын біліктілік талаптарына сәйкестігін растау үшін табыс етуге тиісті құжаттарға қойылатын талаптар;

2) техникалық ерекшеліктерді, жоспарларды, сызбалар мен нобайларды қоса алғанда, ал қажет болған жағдайда нормативтік-техникалық құжаттама көрсетіле отырып, сатып алынатын тауарлар, жұмыстар және көрсетілетін қызметтер сипатталған жазбалар мен олардың талап етілетін техникалық және сапалық
с и п а т т а м а л а р ы ;

3) сатып алынатын тауардың саны, орындалатын жұмыстар мен көрсетілетін
қ ы з м е т т е р д і ң к ө л е м і ;

4) тауарлардың жеткізілу, жұмыстардың орындалу немесе қызметтердің
к ө р с е т і л у о р н ы ;

5) тауарлар жеткізудің, жұмыстар орындаудың немесе қызметтер көрсетудің
т а л а п е т і л е т і н м е р з і м д е р і ;

б) төлем талаптары және мемлекеттік сатып алу туралы үлгі шарт;

7) жеңіп шыққан конкурстық өтінімді анықтау негізделетін бағадан басқа, барлық өлшемдердің сипаттамасы, соның ішінде мұндай әрбір өлшемдердің салыстырмалы мәні, конкурстық өтінімдерді бағалау мен салыстыру тәсілінің
с и п а т т а м а с ы ;

8) егер тауарлардың, жұмыстар мен көрсетілетін қызметтердің балама сипаттамаларына жол берілсе, баламалы конкурстық өтінімдерге баға беру мен салыстыру тәсілінің тиісті нұсқамасы мен сипаттамасы, шарттың ережелері

немесе конкурстық құжаттамада айтылған басқа да талаптар;

9) тауарлардың, жұмыстар мен көрсетілетін қызметтердің өз құнынан басқа, бағаның басқа элементтерді (тасымалдауға және сақтандыруға, кеден баждарын, салықтар мен алымдарды және т.б. төлеуге арналған шығыстарды) қамтуға тиіс екендігіне не тиіс еместігіне нұсқамаларды қоса алғанда, конкурстық өтінімнің бағасын есептеу әдістемесі;

10) конкурстық өтінімнің бағасы көрсетілуге тиісті валютаны немесе валюталарды және конкурстық өтінімдердің бағасын салыстыру мен бағалау мақсатында бірыңғай валютаға келтіру үшін қолданылатын бағам;

11) Қазақстан Республикасының тіл туралы заңдарына сәйкес конкурстық өтінімдерді, мемлекеттік сатып алу туралы шартты жасау мен табыс етудің тіліне қойылатын талаптар;

12) конкурстық өтінімді енгізу талаптары, мазмұны мен қамтамасыз етін нысаны;

13) ықтимал өнім берушінің конкурстық өтінім берудің соңғы мерзімі өткенге дейін өзінің конкурстық өтінімін өзгерту немесе кері қайтарып алу құқығына тиісті нұсқама;

14) конкурстық өтінімдер беру тәсілі, орны және соңғы мерзімі (бірақ жұмыс күніндегі жергілікті уақыт бойынша он бес сағаттан кешіктірмей) және олардың қолданылу мерзімі;

15) ықтимал өнім берушінің конкурстық өтінімнің бір бөлігін ұсыну құқығына тиісті нұсқау, онда конкурстық өтінім бар конверттерді тікелей ашу сәтінде сатып алынатын тауарлардың, орындалатын жұмыстардың және көрсетілетін қызметтердің бағасы көрсетіледі;

16) конкурстық құжаттаманың мазмұны бойынша ықтимал өнім берушілердің солардың көмегімен түсіндірме сұрата алатын тәсілдері және конкурсты ұйымдастырушының сол кезеңде ықтимал өнім берушілермен ашық нысанда өткізілетін және хаттамаланатын кездесу өткізу ниеті туралы хабарламасы;

17) конкурстық өтінімдер салынған конверттер ашылатын орын, күн және уақыт (бірақ конкурстық өтінімдерді табыс етудің соңғы мерзімі өткен кезден бастап екі сағаттан кешіктірмей);

18) конкурстық өтінімдер салынған конверттерді ашу және конкурстық өтінімдерді қарау үшін пайдаланылатын рәсімдер;

19) конкурс өткізу кезінде конкурсты ұйымдастырушының өкілдік етуге ол уәкілеттік берген лауазымды адамдары туралы мәліметтер;

20) мемлекеттік сатып алу туралы шарт бойынша міндеттемелердің орындалуын қамтамасыз етуді енгізу талаптары, оның нысаны, көлемі мен тәсілі;

21) отандық тауар өндірушіге - ықтимал өнім берушілерге басымдық беру талаптары мен тәртібі көрсетілген конкурстық құжаттаманы табыс етуге міндетті.

2. Біртекті тауарларды, жұмыстар мен көрсетілетін қызметтерді сатып алу жөнінде конкурс өткізу кезінде конкурсты ұйымдастырушы конкурстық құжаттамада тауарларды, жұмыстар мен көрсетілетін қызметтерді оларды жеткізіп беру (орындау, көрсету) орны бойынша бөліктерге (лоттарға) бөлуге міндетті. Біртекті тауарлардың, жұмыстар мен көрсетілетін қызметтердің бірнеше түрін сатып алу жөнінде конкурс өткізу кезінде конкурсты ұйымдастырушы конкурстық құжаттамада тауарларды, жұмыстар мен көрсетілетін қызметтерді олардың біртекті түрлері бойынша және (немесе) жеткізіп беру (орындау, көрсету) орны бойынша бөліктерге (лоттарға) бөлуге міндетті. Бұл орайда конкурс жеңімпазы тауарлардың, жұмыстар мен көрсетілетін қызметтердің әрбір лоты бойынша анықталады.

3. Құрылыс мерзімі алты айдан асатын құрылыс объектілеріне мердігерлік жұмыстарды мемлекеттік сатып алу өткізілген жағдайда, конкурсты ұйымдастырушы конкурстық құжаттамада сатып алу үшін көзделген ең жоғары соманы көрсетуге құқылы.

4. Конкурсты ұйымдастырушы конкурстық құжаттаманы табыс еткені үшін конкурстық құжаттаманың көшірмесіне нақты жұмсалған шығындардан аспайтын, ал жабық конкурс өткізілген жағдайда оны жіберу үшін де Қазақстан Республикасының Үкіметі белгілейтін тәртіп пен талаптар бойынша ақы алуға құқылы.

Егер конкурсты ұйымдастырушы мемлекеттік мекеме болса, мұндай ақы тиісті бюджет кірісінің есебіне аударылады.

5. Ықтимал өнім беруші конкурстық құжаттама ережелеріне түсіндірме беру туралы сұрау салып жүгінуге құқылы, бірақ ол конкурстық өтінімді табыс етудің соңғы мерзімі өткенге дейінгі күнтізбелік он күннен кешіктірілмеуі керек. Конкурсты ұйымдастырушы сұрау салу тіркелген кезден бастап үш күн мерзім ішінде оған жауап қайтаруға және сұрау салудың кімнен түскенін көрсетпестен, конкурсты ұйымдастырушы конкурстық құжаттаманы табыс еткен барлық ықтимал өнім берушіге осындай түсіндірмені хабарлауға міндетті.

6. Конкурсты ұйымдастырушы конкурстық өтінімді табыс етудің соңғы мерзімі өткенге дейін күнтізбелік бес күннен кешіктірмей өз бастамасымен немесе ықтимал өнім берушінің сауалына жауап ретінде хаттама ресімдеу арқылы конкурстық құжаттамаға өзгерістер енгізуге құқылы. <*>

Енгізілген өзгерістердің міндетті күші болады және конкурсты ұйымдастырушы конкурстық құжаттаманы берген барлық ықтимал өнім берушілерге олар туралы дереу хабарлайды. Бұл орайда конкурсты

ұйымдастырушы ықтимал өнім берушілердің бұл өзгерістерді конкурстық өтінімдерде есепке алуы үшін конкурстық өтінімдерді табыс етудің соңғы мерзімін кемінде күнтізбелік он күн мерзімге ұзартады.

7. Конкурсты ұйымдастырушы конкурстық құжаттаманың ережелеріне түсіндірме беру үшін конкурстық құжаттамада көрсетілген белгілі бір орында және тиісті уақытта ықтимал өнім берушілермен кездесу өткізуге құқылы. Бұл орайда конкурсты ұйымдастырушы осы кездесу барысында табыс етілген конкурстық құжаттамаға түсіндірме беру туралы сауал салу көздері көрсетілмеген сауалдарды, сондай-ақ осы сауалдарға жауаптарды қамтитын хаттама жасайды. Хаттама конкурстық комиссияға және конкурсты ұйымдастырушы конкурстық құжаттаманы табыс еткен барлық ықтимал өнім берушілерге дереу жіберіледі.

8. Конкурстық құжаттама уәкілетті орган бекітетін үлгі негізінде жасалады.

Конкурстық құжаттаманы конкурсты ұйымдастырушы бекітеді.

Ескерту. 12-бапқа өзгеріс енгізілді - Қазақстан Республикасының 2004.07.05. N 569 Заңымен .

13-бап. Конкурстық өтінімдердің қолданылу, табыс етілу, өзгертілу және кері қайтарып алыну мерзімі

1. Конкурсқа қатысуға тілек білдірген ықтимал өнім беруші конкурстық өтінімдерді табыс етудің соңғы мерзімі өткенге дейін конкурстық құжаттамаға сәйкес конкурстық өтінімді желімделген конвертке салып конкурсты ұйымдастырушыға табыс етуге міндетті.

Ықтимал өнім беруші өзінің конкурстық өтінімін дайындауға және беруге, сондай-ақ өзінің осы Заңның 12-бабының 7-тармағына сәйкес конкурсты ұйымдастырушы өткізетін кездесуге қатысуына байланысты барлық шығыстарды көтереді. Конкурсты ұйымдастырушы, тапсырыс беруші және конкурстық комиссия конкурстың нәтижелеріне қарамастан, осы шығыстарды өтеу жөнінде міндеттеме алмайды.

2. Конкурстық өтінімдер конкурстық құжаттамаға сәйкес онда көрсетілген мерзім ішінде күшінде қалады.

3. Конкурсты ұйымдастырушы конкурстық өтінімдердің қолданылу мерзімі өткенге дейінгі күнтізбелік он күннен кешіктірмей ықтимал өнім берушілерден осы мерзімді нақты уақыт кезеңіне ұзартуды өтінуге құқылы. Ықтимал өнім беруші өзі берген конкурстық өтінімді қамтамасыз етуді қайтып алу құқығын жоғалтпай, мұндай сауалды қабылдамауға құқылы және оның конкурстық өтінімінің мерзімі ұзартылмаған қолданылу мерзімі біткен соң аяқталады.

4. Ықтимал өнім беруші өзі берген конкурстық өтінімді қамтамасыз етуді қайтарып алу құқығын жоғалтпай, конкурстық өтінімдерді табыс етудің соңғы

мерзімі өткенге дейін өзінің конкурстық өтінімін өзгертуге немесе кері қайтарып алуға құқылы. Мұндай өзгеріс немесе кері қайтарып алу туралы хабарлама, егер оны конкурсты ұйымдастырушы конкурстық өтінімдерді табыс етудің соңғы мерзімі өткенге дейін алса, жарамды болып табылады.

5. Конкурстық өтінім берудің ең соңғы мерзімі өтіп кеткеннен кейін берілген конкурстық өтінім ашылмайды және ол ықтимал өнім берушіге қайтарылады.

14-бап. Конкурстық өтінімді қамтамасыз ету

1. Конкурса қатысуға тілек білдірген ықтимал өнім беруші, осы баптың 2-тармағында көзделген жағдайларды қоспағанда, конкурстық құжаттамада көзделген, конкурстық өтінімдерді табыс етудің соңғы мерзімі өткеннен кейін өзінің конкурстық өтінімін кері қайтарып алмайтынына немесе өзгертпейтініне кепілдік беретін нысанда, тәсіл мен жағдайларда мәлімделген жалпы соманың бір процентінен үш процентіне дейінгі мөлшерде конкурстық өтінімді қамтамасыз етуді енгізуге, сондай-ақ оның конкурстық өтінімі жеңіп шықты деп танылған жағдайда мемлекеттік сатып алу туралы шарт жасасуға міндетті. Бұл ретте конкурстық өтінімді қамтамасыз ету мөлшері барлық конкурса қатысушылар үшін бірдей болуға тиіс.

2. Ықтимал өнім берушілер, егер:

1) олар шағын кәсіпкерлік субъектілері болып табылатын және тұтас алғанда конкурс бойынша олар ұсынатын тауарлардың, жұмыстардың және көрсетілетін қызметтердің көлемі құны жағынан тиісті қаржы жылына арналған республикалық бюджет туралы заңда белгіленген айлық есептік көрсеткіштің алты мың еселенген мөлшерінен аспайтын жағдайда ғана;

1-1) олар Қазақстан Республикасы мүгедектерінің қоғамдық бірлестіктері құрған тауар өндіруші, жұмыстар орындаушы және қызмет көрсетуші ұйымдар болса және тұтас алғанда конкурс бойынша олар ұсынатын тауарлардың, жұмыстар мен көрсетілетін қызметтердің көлемі құны жағынан тиісті қаржы жылына арналған республикалық бюджет туралы заңда белгіленген айлық есептік көрсеткіштің он сегіз мың еселенген мөлшерінен аспайтын жағдайда ғана ;

2) мемлекеттік сатып алу нысанасы іргелі және қолданбалы ғылыми зерттеулер, талдамалар жүргізу болса;

3) олар екі кезенді рәсімдерді пайдалана отырып, конкурстың бірінші кезеңіне қатысса ;

4) олар қайталама рыноктағы тұрғын үйді мемлекеттік сатып алу жөніндегі конкурса қатысушы жеке тұлғалар болып табылса;

5) олар мемлекеттік әлеуметтік тапсырыс алуға конкурса қатысушы үкіметтік емес ұйымдар болып табылса, конкурстық өтінімді қамтамасыз етуді енгізбейді .

3. Конкурстық өтінімді қамтамасыз ету:

- 1) банкте орналастырылатын ақша кепілі;
- 2) банк кепілдігі түрінде берілуі мүмкін.

4. Конкурстық өтінімді қамтамасыз етудің қолданылу мерзімі конкурстық өтінімнің өзінің қолданылу мерзімінен кем болмауға тиіс.

5. Конкурстық өтінімді қамтамасыз ету, егер ықтимал өнім беруші:

- 1) конкурстық өтінімді табыс етудің соңғы мерзімі өткеннен кейін конкурстық өтінімді кері қайтарып алса немесе өзгертсе;
- 2) конкурстың жеңімпазы ретінде анықтала отырып, мемлекеттік сатып алу туралы шарт жасаспаса;

3) конкурстық құжаттамада көзделген нысанда, көлемде және талаптарда мемлекеттік сатып алу туралы шартқа қол қойылғаннан кейін мемлекеттік сатып алу туралы шарттың орындалуын қамтамасыз етуді енгізбесе, конкурстық өтінімді және тиісті қамтамасыз етуді табыс еткен ықтимал өнім берушіге қайтарылмайды.

Бұл орайда, мемлекеттік сатып алу мемлекеттік бюджеттің қаражаты есебінен жүзеге асырылған жағдайда, конкурстық өтінімді қамтамасыз ету сомасы тиісті бюджет кірісіне немесе, егер ол конкурсты ұйымдастырушы болса, Қазақстан Республикасы Ұлттық Банкінің есебіне аударылады.

6. Конкурсты ұйымдастырушы ықтимал өнім берушіге енгізілген конкурстық өтінімді қамтамасыз ету келіп түскен кезінен бастап мынадай жағдайларда:

- 1) конкурстық өтінімнің қолданылу мерзімі өткен;
- 2) мемлекеттік сатып алу туралы шарт күшіне енген;
- 3) конкурстың жеңімпазы анықталмай, мемлекеттік сатып алу рәсімдері тоқтатылған;
- 4) конкурстық өтінімдерді табыс етудің соңғы мерзімі өткенге дейін конкурстық өтінім кері қайтарып алынған;
- 5) конкурстық құжаттаманың талаптарына сай келмейді деп, конкурстық өтінім қабылданбаған;

6) басқа ықтимал өнім беруші конкурстың жеңімпазы болып айқындалған жағдайларда бес жұмыс күні ішінде қайтарып береді.

Ескерту. 14-бапқа өзгеріс енгізілді - Қазақстан Республикасының 2004.07.05. N 569, 2005.04.12. N 35 Заңдарымен.

15-бап. Конкурстық өтінімдер салынған конверттерді ашу

1. Конкурстық комиссия конкурстық өтінімдер салынған конверттерді конкурстық құжаттамада көрсетілген мерзімде, уақыт пен орында ашады. Конкурстық өтінімді табыс еткен ықтимал өнім беруші немесе оның уәкілетті өкілі конкурстық өтінімдер салынған конверттерді ашқан кезде қатысуға құқылы.

2. Конкурстық өтінімдер салынған конверттерді ашқан кезде конкурстық комиссия қатысып отырған тұлғаларға конкурсқа қатысатын ықтимал өнім берушілердің атауы мен тұратын жерін, олар ұсынған бағаны, егер олар құжат арқылы көрсетілсе, конкурстық өтінімдерді кері қайтарып алуды және өзгертуді, конкурстық өтінімді құрайтын құжаттардың болуы немесе болмауы туралы ақпаратты хабарлайды және конкурстық өтінімдерді ашу хаттамасын жасайды.

Конкурстық өтінімдерді ашу хаттамасының конкурстық комиссиясының мүшелері және хатшысы қол қойған көшірмесі ашу рәсімі кезінде қатысушы ықтимал өнім берушілерге беріледі, қатыспағандарға - олардан сауал салу алынған күннен бастап екі жұмыс күні мерзімінен кешіктірілмей жіберіледі.

Ескерту. 15-бапқа өзгеріс енгізілді - Қазақстан Республикасының 2004.07.05. N 569 Заңымен .

16-бап. Конкурстық өтінімдерді қарау, бағалау мен салыстыру және конкурс қорытындыларын шығару

1. Конкурстық өтінімдерді қарау, бағалау және салыстыру кезінде:

1) конкурстық комиссия конкурстық өтінімдерді қарау, бағалау және салыстыруды жеңілдету үшін ықтимал өнім берушілерден олардың конкурстық өтінім беруіне байланысты түсіндірмелер сұратуға құқылы;

1-1) ықтимал өнім берушілердің конкурстық өтінімдеріндегі мәліметтерді нақтылау мақсатында конкурстық комиссия тиісті мемлекеттік органдардан, жеке және заңды тұлғалардан қажетті ақпарат сұратуға құқылы;

2) конкурстық құжаттаманың талаптарына сай келмейтін конкурстық өтінімді осы талаптарға сәйкес келтіру үшін сауалдар, ұсыныстар немесе рұқсаттар ж а с а у ғ а ж о л б е р і л м е й д і .

1-1. Ықтимал өнім берушінің конкурстық өтінімін бағалау кезінде осы ықтимал өнім берушіден тауарларды, жұмыстарды және көрсетілетін қызметтерді тапсырыс берушінің сатып алумен байланысты барлық шығыстары е с к е р і л е д і .

2. Конкурстық комиссия конкурстық өтінімді, егер онда конкурстық өтінімнің мәнін өзгертпей түзетуге келетін грамматикалық немесе арифметикалық қателер болса, конкурстық құжаттаманың талаптарына сай келетін конкурстық өтінім ретінде қарайды.

3. Конкурстық комиссия, егер:

1) осы конкурстық өтінімді табыс еткен ықтимал өнім беруші біліктілік т а л а п т а р ы н а с а й к е л м е с е ;

2) ықтимал өнім беруші, осы Заңның 14-бабының 2-тармағында көзделген жағдайларды қоспағанда, конкурстық құжаттамада көзделген нысанда, көлем мен талаптарда конкурстық өтінімді қамтамасыз етуді енгізбесе;

3) осы конкурстық өтінім, осы баптың 2-тармағында көзделген жағдайларды

қоспағанда, конкурстық құжаттаманың талаптарына сай келмесе;

3-1) осы конкурстық өтінімді тауарларды, жұмыстарды және көрсетілетін қызметтерді сатып алу өз мүддесіне орай жүзеге асырылатын тұлға берсе;

4) конкурсқа қатысуға жіберілген ықтимал өнім берушінің конкурстық өтінімінің бағасы осы тауарларды, жұмыстарды және көрсетілетін қызметтерді сатып алуға бөлінген сомадан артық болса, конкурстық өтінімді қабылдамайды.

Объектілерді салуға және оларға ілеспе тауарларға және (немесе) көрсетілетін қызметтерге мердігерлік жұмыстарды мемлекеттік сатып алу жөніндегі, сондай-ақ әзірленуінің технологиялық мерзімі бір жылдан асатын тауарларды сатып алуға конкурс өткізілген кезде, егер конкурсқа қатысуға жіберілген ықтимал өнім берушінің конкурстық өтінімінің бағасы осы тауарларды, жұмыстарды және көрсетілетін қызметтерді сатып алу үшін көзделген сомадан артық болған жағдайда да оның конкурстық өтінімі қабылданбайды.

3-1. Егер ықтимал өнім берушінің конкурстық өтінімінің бағасы демпингтік болып табылатын жағдайда, конкурстық комиссия оның конкурстық өтінімін қабылдамауға құқылы. Конкурстық өтінімнің демпингтік бағасын айқындау тәртібін Қазақстан Республикасының Үкіметі белгілейді.

4. Егер конкурсқа қатысуға біліктілік талаптарын қанағаттандыратын екеуден кем ықтимал өнім беруші конкурстық өтінім берсе, конкурстық комиссия конкурс өтпеді деп таниды.

Тауарлардың, жұмыстар мен көрсетілетін қызметтердің біртекті түрлерін сатып алуға конкурс өткізу кезінде, егер қайсыбір лот бойынша біліктілік талаптарына сай келмейтін екеуден кем ықтимал өнім беруші конкурстық өтінім бермесе, конкурстық комиссия осы лот бойынша конкурс өтпеді деп таниды.

Егер конкурстық құжаттама талаптарына сай келетін екіден кем конкурстық өтінім ұсынылған болса да конкурстық комиссия конкурсты өтпей қалды деп таниды.

5. Егер конкурс тұтас алғанда немесе қайсыбір лот бойынша өтпеді деп танылса, тапсырыс беруші конкурсты ұйымдастырушыға:

1) қажет болған жағдайда конкурстық құжаттаманың мазмұнын өзгертуді және қайтадан конкурс өткізуді;

2) екі кезенді рәсімді пайдалана отырып, конкурс өткізуді ұсынуға құқылы.

6. Конкурстық комиссия конкурсқа қатысу үшін қабылданған конкурстық өтінімдерге баға беріп, оларды салыстырады және мынадай өлшемдерді ескере отырып, ең төменгі баға негізінде жеңіп шыққан конкурстық өтінімді айқындайды:

1) **алып тасталды**

2) сатып алынатын тауарларды пайдалануға, техникалық қызмет көрсетуге және жөндеуге арналған шығыстар;

3) тауарларды жеткізіп беру, жұмыстарды аяқтау немесе қызметтерді көрсету мерзімдері ;

4) тауарлардың функционалдық, техникалық және сапалық сипаттамалары;

5) төлем талаптары ;

6) тауарларға, жұмыстар мен көрсетілетін қызметтерге кепілдік беру талаптары ;

7) мейлінше жоғары экономикалық тиімділікті қамтамасыз ететін басқа да өлшемдер (қосымша инвестициялар, жұмыспен қамтуды ынталандыру, технологияны беру мен басқару, ғылыми және өндіріс кадрларын даярлау), сондай-ақ сатып алынатын тауарлардың, жұмыстар мен көрсетілетін қызметтердің тиісті рыногындағы жұмыс тәжірибесі;

8) осы Заңның 26-бабына сәйкес отандық тауар өндірушілерді - ықтимал өнім берушілерді қолдау ;

9) ықтимал өнім берушінің біліктілік деректері.

7. Мемлекеттік сатып алудың нысанасы консультациялық қызметтер көрсетуді тарту болатын жағдайда:

1) конкурстық өтінімнің бағасы;

2) консультациялық қызметтердің сапалық сипаттамалары;

3) ықтимал өнім берушінің осы қызметтер көрсету рыногындағы жұмыс тәжірибесі ;

4) ықтимал өнім берушінің біліктілік деректері, беделі, сенімділігі, кәсіптік құзыретті іріктеу өлшемдері болып табылады.

8. Егер Қазақстан Республикасының заңдарында өзгеше көзделмесе, конкурстық комиссия конкурстық өтінімдер салынған конверттер ашылған күннен бастап күнтізбелік он күннен аспайтын мерзімде конкурстың қорытындыларын шығарады .

9. Конкурстың қорытындылары осы Заңның 17-бабына сәйкес отырысқа қатысқан конкурстық комиссияның мүшелері мен хатшысы қол қоятын хаттама түрінде ресімделеді .

10. Конкурсты ұйымдастырушы конкурстың қорытындылары шығарылған күннен бастап үш жұмыс күні ішінде конкурстың қорытындылары туралы хаттаманың көшірмесін уәкілетті органға табыс етеді.

Конкурсты ұйымдастырушы конкурс қорытындылары шығарылған күннен бастап жеті жұмыс күні ішінде конкурс нәтижелерін оның атауын, жеңімпазы мен оның мекен-жайын, конкурс жеңімпазы ұсынған тауарлардың, жұмыстар мен көрсетілетін қызметтердің атауын және бірлігінің бағасын көрсете отырып, егер осы Заңда өзгеше көзделмесе, мерзімді баспасөзде жариялау жолымен барлық қатысқан ықтимал өнім берушілерге хабарлайды.

Ескерту. 16-бапқа өзгеріс енгізілді - Қазақстан Республикасының 2004.07.05. N 569 Заңымен .

17-бап. Конкурс қорытындылары туралы хаттама

1. Конкурс арқылы мемлекеттік сатып алу жүзеге асырған кезде конкурстық комиссия конкурстың қорытындылары туралы хаттама ресімдеуге міндетті, онда мынадай ақпарат болуға тиіс:

1) әрбір лот бойынша конкурс жеңімпазының атауы мен орналасқан жері және жеңімпаз анықталатын талаптар көрсетіле отырып, сатып алынатын тауарлардың, жұмыстар мен көрсетілетін қызметтердің атауы және қысқаша сипаттамасы ;

2) конкурстық өтінімдерді табыс еткен ықтимал өнім берушілердің атауы мен орналасқан жері ;

3) конкурстық өтінімдерді табыс еткен ықтимал өнім берушілердің біліктілік деректері туралы немесе осындай деректердің жоқ болуы туралы;

4) әрбір конкурстық өтінімнің бағасы және басқа да негізгі жағдайларының қысқаша мазмұны ;

5) конкурстық өтінімдерді бағалаудың мазмұны және оларды салыстыру;

6) конкурстық өтінімдерді қабылдамаудың себептерін көрсету;

7) егер конкурс нәтижесінде жеңімпаз анықталмаса, себептерін көрсету;

8) конкурстық құжаттамаға түсіндірме беру туралы сауалдардың, оларға қайтарылған жауаптардың қорытылған мазмұны, сондай-ақ конкурстық құжаттамаға енгізілген өзгерістер мен толықтырулардың қорытылған мазмұны;

9) мемлекеттік сатып алу туралы шартқа қол қойылуға тиіс болған мерзім (конкурс жеңімпазы хабарламаны алған кезден бастап үш жұмыс күнінен аспауы керек) ;

10) егер конкурс өткен жағдайда, - сатып алуға бөлінген сома.<*>

Конкурстық өтінімді ұсынған ықтимал өнім беруші конкурстың қорытындылары мерзімді баспасөзде жарияланған күннен бастап күнтізбелік бес күн ішінде конкурстың қорытындылары бойынша уәкілетті органға шағым жасауға құқылы. Бұл ретте мемлекеттік сатып алуды жүзеге асыру процесінде туындаған даулар Қазақстан Республикасының заңдарына сәйкес қаралады.

2. Конкурсның қорытындылары туралы хаттама конкурсқа қатысуға конкурстық өтінімді табыс еткен кез келген ықтимал өнім берушінің талап етуі бойынша конкурс қорытындылары шығарылғаннан кейін табыс етіледі. Егер бұл ақпаратта Қазақстан Республикасының мемлекеттік құпиялары болып табылатын мәліметтер болған жағдайда, ол Қазақстан Республикасының мемлекеттік құпиялар туралы заңдарында белгіленген тәртіппен беріледі.

Ескерту. 17-бапқа өзгеріс енгізілді - Қазақстан Республикасының 2004.07.05. N 569 Заңымен .

3-ТАРАУ. МЕМЛЕКЕТТІК САТЫП АЛУДЫ БАСҚА ТӘСІЛДЕРМЕН ЖҮЗЕГЕ АСЫРУ

18-бап. Жабық конкурс

1. Жабық конкурс уәкілетті органның келісімі бойынша, тауарлар, жұмыстар мен көрсетілетін қызметтер олардың күрделі немесе мамандандырылған сипатта болуы себебімен ықтимал өнім берушілердің конкурсты ұйымдастырушыға алдын ала мәлім шектеулі санында ғана болған жағдайларда өткізіледі.

2. Жабық конкурс өткізу туралы хабарлама сатып алынатын тауарлары, жұмыстары мен көрсетілетін қызметтері бар барлық ықтимал өнім берушілерге осы конкурсқа қатысуға өтінімдер қабылдау аяқталатын күнге дейін бір айдан кешіктірілмейтін мерзімде жіберілуге тиіс.

Хабарлама жіберілетін ықтимал өнім берушілердің тізімін тапсырыс берушінің басшысы бекітеді.

3. Жабық конкурс тәсілімен мемлекеттік сатып алуды жүзеге асыру кезінде, егер осы бапта өзгеше көзделмесе, осы Заңның 2-тарауында көзделген нормалар қолданылады.

19-бап. Екі кезеңді рәсімдер пайдаланылатын конкурс

1. Екі кезеңді рәсімдер пайдаланылатын конкурс:

1) тауарлардың, жұмыстар мен көрсетілетін қызметтердің егжей-тегжейлі ерекшеліктерін толық тұжырымдау, олардың техникалық және өзге де сипаттамаларын анықтау қиын және ықтимал өнім берушілердің ұсыныстарын сұрау не туындаған мәселелер бойынша олармен келіссөз жүргізу қажет болған;

2) ғылыми зерттеулер, эксперименттер, іздестірулер жүргізу немесе талдамалар жасау қажет болған;

3) бір кезеңді ашық конкурс немесе жабық конкурс жеңімпазды анықтауға жеткізбеген жағдайларда өткізіледі.

2. Екі кезеңді рәсімдер пайдаланылатын конкурс мынадай кезеңдердің:

1) сатып алынатын тауарлардың, жұмыстар мен көрсетілетін қызметтердің техникалық, сапалық немесе өзге сипаттамаларына, оларды берудің (орындаудың, қызмет көрсетудің) шарттық талаптарына қатысты ұсыныстарды ықтимал өнім берушілерден конкурстық құжаттама негізінде сұрату; ықтимал өнім берушілер конкурстық құжаттамаға сәйкес бағасын көрсетпей табыс еткен бастапқы конкурстық өтінімдерді қарау; ықтимал өнім берушілердің біліктілік деректерін қарау; қажет болған жағдайда тауарлардың, жұмыстар мен көрсетілетін қызметтердің техникалық, сапалық немесе өзге сипаттамаларына, оларды берудің (орындаудың, қызмет көрсетудің) шарттық талаптарына қатысты мәселелерді біліктілік талаптарына сай келетін ықтимал өнім берушілермен т а л қ ы л а у ;

2) ықтимал өнім берушілер табыс еткен тауарлардың, жұмыстар мен

көрсетілетін қызметтердің техникалық, сапалық немесе өзге де сипаттамалары негізінде конкурстық құжаттамаға конкурсты ұйымдастырушының өзгерістер енгізуі; конкурстың бірінші кезеңінен өткен ықтимал өнім берушілердің түпкілікті конкурстық өтінімдерді табыс етуі; олардың бағасы мен бағалық ұсыныстарын және бағалау өлшемдерін ескере отырып салыстыру, конкурс қорытындыларын шығару кезеңдерінің жиынтығы болып табылады.

3. Екі кезеңді рәсімдер пайдаланылатын конкурс арқылы мемлекеттік сатып алуды жүзеге асыру кезінде бастапқы конкурстық құжаттамада осы Заңның 12-бабы 1-тармағының 2), 7)-9) тармақшаларында айтылған ақпарат болмауы м ү м к і н .

4. Ықтимал өнім беруші конкурстық өтінімді қамтамасыз етуді қайтару құқығын жоғалтпай, түпкі конкурстық өтінімді табыс етпеуге құқылы.

5. Конкурсстық комиссия түпкі конкурстық өтінімдер салынған конверттер ашылған күннен бастап күнтізбелік он күннен аспайтын мерзімде екі кезеңді рәсімдер пайдаланылатын конкурстың қорытындыларын шығарады.

6. Екі кезеңді рәсімдер пайдаланылатын ашық конкурс тәсілімен мемлекеттік сатып алуды жүзеге асыру кезінде, егер осы бапта өзгеше белгіленбесе, осы Заңның 2-тарауында көзделген нормалар қолданылады.

Екі кезеңді рәсімдер пайдаланылатын жабық конкурс тәсілімен мемлекеттік сатып алуды жүзеге асыру кезінде, егер осы бапта өзгеше белгіленбесе, осы Заңның 18-бабында көзделген нормалар қолданылады.

20-бап. Өнім берушіні баға ұсыныстарын сұратуды пайдалана отырып таңдау

1. Өнім берушіні баға ұсыныстарын сұратуды пайдалана отырып таңдау тапсырыс беруші үшін егжей-тегжейлі ерекшеліктерінің елеулі маңызы жоқ, нақтылы бар тауарларға, жұмыстар мен көрсетілетін қызметтерге жүргізіледі, бұл орайда баға шешуші талап болып табылады.

2. Өнім берушіні баға ұсыныстарын сұратуды пайдалана отырып таңдау, осы тармақтың екінші бөлігінде белгіленген жағдайларды қоспағанда, қандай болса да біртекті тауарларды, жұмыстарды және көрсетілетін қызметтерді мемлекеттік сатып алудың жылдық көлемдері құны жағынан тиісті қаржы жылына арналған республикалық бюджет туралы заңда белгіленген айлық есептік көрсеткіштің төрт мың еселенген мөлшерінен аспаған жағдайда ғана қолданылады.

Мемлекеттік бюджеттің, Қазақстан Республикасының Ұлттық Банкі бюджетінің қаражаты есебінен қамтылатын мемлекеттік органдар мен мемлекеттік мекемелер қандай болса да біртекті тауарларды, жұмыстарды және көрсетілетін қызметтерді мемлекеттік сатып алудың жылдық көлемінің құны жағынан тиісті қаржы жылына арналған республикалық бюджет туралы заңда белгіленген айлық есептік көрсеткіштің екі мың еселенген мөлшерінен аспаған

жағдайда ғана өнім берушіні баға ұсыныстарын сұратуды пайдалана отырып
таңдауға қ ұ қ ы л ы .

3. Өнім берушіні баға ұсыныстарын пайдалана отырып таңдау әдісін қолдану мақсатында қаржы жылы ішінде тауарлардың, жұмыстар мен көрсетілетін қызметтердің біртекті түрлерін сатып алудың жылдық көлемін олардың ең болмаса біреуінің мөлшері осы баптың 2-тармағында белгіленгеннен кем болатындай бөліктерге бөлшектеуге жол берілмейді.

4. Тапсырыс беруші кем дегенде екі аффилиирлендірілмеген ықтимал өнім берушіден сатып алынатын тауарларға, жұмыстар мен көрсетілетін қызметтерге жазбаша баға ұсыныстарын сұратады және белгіленген мерзімде түскен барлық баға ұсыныстарын қарайды. Тапсырыс беруші ең төмен баға ұсынысын табыс еткен ықтимал өнім берушіден тауарларды, жұмыстар мен көрсетілетін қызметтерді с а т ы п а л а д ы .

Ескерту. 20-бапқа өзгеріс енгізілді - Қазақстан Республикасының 2004.07.05. N 569 Заңымен .

21-бап. Бір көзден мемлекеттік сатып алу

1. Бір көзден мемлекеттік сатып алу конкурсты қолданбай сатып алуды білдіреді және :

1) сатып алынатын тауарлар, жұмыстар мен көрсетілетін қызметтер табиғи монополияның субъектісі болып табылатын ықтимал өнім берушіде ғана нақтылы болған немесе қандай да бір нақты ықтимал өнім берушінің баламасы жоқ болған жағдайда осы тауарларға, жұмыстар мен көрсетілетін қызметтерге қатысты айрықша құқықтары болған;

1-1) сатып алынатын тауарлар, жұмыстар мен көрсетілетін қызметтер белгілі бір тауар рыногындағы үлесі жүз процентке тең, осы рынокта үстем (монополиялық) жағдайға ие рынок субъектісінде ғана болған немесе балама болмаған ;

1-2) сатып алынатын тауарлар, жұмыстар мен көрсетілетін қызметтер мемлекеттік монополия субъектісі болып табылатын ықтимал өнім берушіде ғана болған ;

2) дүлей зілзалалар (жер сілкіну, сел, көшкін, су тасқыны және басқалар), табиғи өрттер, індеттер мен эпизоотиялар, ауыл шаруашылық өсімдіктері мен ормандарды аурулардың және зиянкестердің зақымдануы туғызған төтенше жағдайлардың, сондай-ақ өнеркәсіп, көлік авариялары мен басқа да авариялар, өрттер (жарылыстар), күшті әсер ететін улы радиоактивті және биологиялық қауіпті заттар шығаратын (шығару қатері бар) өрттер, үйлер мен ғимараттардың кенеттен құлауы, бөгеттердің бұзылуы, тіршілік етудің электр энергетикалық және коммуникациялық жүйелеріндегі, тазалау құрылыстарындағы авариялар туғызған төтенше жағдайлардың салдарынан Қазақстан Республикасының

зандарында белгіленген тәртіппен сол тауарларға, жұмыстар мен көрсетілетін қызметтерге конкурс өткізу мүмкіндігін жоққа шығаратын жедел қажеттіктер туындаған;

3) қандай да бір өнім берушіден тауарлар, жабдықтар, технологиялар, жұмыстар немесе көрсетілетін қызметтер сатып алған тапсырыс берушіде нақ сол тапсырыс берушіде бірыңғайлау, стандарттау немесе қолда бар тауарлармен, жабдықтармен, технологиямен, жұмыстармен немесе көрсетілетін қызметтермен сыйымдылығын қамтамасыз ету мақсатында нақ сол тапсырыс берушіден басқа да сатып алуды жүргізу қажеттігі туындайтын;

4) конкурс өтпей қалды деп танылған және (немесе) тапсырыс беруші қолданған, осы Заңның 16-бабының 5-тармағында көзделген шаралар мемлекеттік сатып алу туралы шарт жасасуға алып келмеген жағдайларда ғана жүргізіледі. Бұл ретте осы ереже конкурс жарамсыз деп танылған жағдайларға қолданылмайды;

5) сатып алғанда стратегиялық маңызы зор тауарлар, жұмыстар мен көрсетілетін қызметтер берушіні осы баптың 3 және 4-тармақтарына сәйкес Қазақстан Республикасының Үкіметі белгілеген;

6) коммуникациялар, тетіктер, агрегаттар, қосалқы бөлшектер мен материалдар жол жүріп бара жатқанда сынған, істен шыққан әрі оларды дереу қалпына келтіру талап етілген жағдайда акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындар, заңды тұлғалар және олармен аффилиирленген заңды тұлғалар уәкілетті органға кейіннен міндетті түрде күнтізбелік он күннен аспайтын мерзімде хабарлай отырып, тауарларды, жұмыстарды және көрсетілетін қызметтерді сатып алған;

7) күн сайын және (немесе) апта сайын тұтынылатын тауарларды, жұмыстарды және көрсетілетін қызметтерді конкурстың қорытындылары шығарылғанға дейінгі кезеңге мемлекеттік сатып алуды жүзеге асыру қажет болған жағдайларда ғана жүргізіледі;

8) кепіл беруші - Қазақстан Республикасының азаматы ипотекалық тұрғын үй заемы бойынша міндеттемені орындауға қабілетсіз болған жағдайда, жергілікті атқарушы орган ипотекалық тұрғын үй заемы бойынша талап ету құқығын сатып алды.

2. Егер мемлекеттік бюджеттің, Қазақстан Республикасының Ұлттық Банкі бюджетінің қаражаты есебінен қамтылатын мемлекеттік органдар мен мемлекеттік мекемелер үшін біртекті тауарларды, жұмыстарды және қызметтерді сатып алудың жылдық көлемі құны жағынан тиісті қаржы жылына арналған республикалық бюджет туралы заңда белгіленген айлық есептік көрсеткіштің екі мың еселенген мөлшерінен, ал акцияларының (үлестерінің) елу және одан да

көбірек проценті немесе акцияларының бақылау пакеті мемлекетке тиесілі мемлекеттік кәсіпорындар, заңды тұлғалар, сондай-ақ олармен аффилиирленген заңды тұлғалар үшін тиісті қаржы жылына арналған республикалық бюджет туралы заңда белгіленген айлық есептік көрсеткіштің төрт мың еселенген мөлшерінен артық болса, осы баптың 1-тармағының 1), 1-1), 3), 4) және 7) тармақшаларында көзделген жағдайларда мемлекеттік сатып алуды тапсырыс беруші уәкілетті органның келісімі бойынша жүзеге асырады. Табиғи монополия субъектілерінің немесе белгілі бір тауар рыногындағы үлесі жүз процентке тең, осы рынокта үстем (монополиялық) жағдайға ие рынок субъектісінің тауарларын , жұмыстарын және көрсетілетін қызметтерін сатып алуы уәкілетті органның келісімін талап етпейді.

Тауарлардың, жұмыстардың және көрсетілетін қызметтердің біртекті түрлерін, егер олардың тіпті біреуінің мөлшері айлық есептік көрсеткіштің:

1) мемлекеттік бюджеттің, Қазақстан Республикасының Ұлттық Банкі бюджетінің қаражаты есебінен қамтылатын мемлекеттік органдар мен мемлекеттік мекемелер үшін тиісті қаржы жылына арналған республикалық бюджет туралы заңда белгіленген айлық есептік көрсеткіштің екі мың еселенген мөлшерінен ;

2) акцияларының (үлестерінің) елу және одан көбірек проценті немесе акцияларының бақылау пакеті мемлекетке тиесілі мемлекеттік кәсіпорындар, заңды тұлғалар, сондай-ақ олармен аффилиирленген заңды тұлғалар үшін тиісті қаржы жылына арналған республикалық бюджет туралы заңда белгіленген айлық есептік көрсеткіштің төрт мың еселенген мөлшерінен кем болса, сатып алудың жылдық көлемін қаржы жылы ішінде бөлшектеуге жол берілмейді.

Осы баптың 1-тармағының 1-2) тармақшасына сәйкес мемлекеттік сатып алуды жүзеге асыру кезінде тапсырыс берушілер мемлекеттік монополия субъектілерінен осы субъектілер мемлекеттік монополия субъектілері ретінде айқындалған бөлігінде көрсететін қызметтерді ғана сатып алуға құқылы. Бұл ретте уәкілетті органның келісімі талап етілмейді.

3. Бір көзден мемлекеттік сатып алуды жүзеге асыру кезінде конкурстық комиссия осындай ықтимал өнім берушіден тауарлардың, жұмыстар мен көрсетілетін қызметтердің осы ықтимал өнім беруші ұсынып отырған бағасының барлық қажетті негіздемелерін сұратады.

Осы баптың 1-тармағының б) тармақшасында көзделген жағдайда мемлекеттік сатып алу бір көзден сатып алу тәсілімен жүргізілген кезде конкурстық комиссияны құру талап етілмейді. <*>

4. Бір көзден мемлекеттік сатып алуды жүзеге асыру кезінде ықтимал өнім беруші, осы баптың 1-тармағының 1), 1-1), 1-2) және б) тармақшаларында көзделген жағдайларды қоспағанда, осы Заңның 8-бабында көзделген біліктілік

талаптарына сәйкес келуге тиіс. Осы баптың 1-тармағының 1), 1-1), 1-2) және 6) тармақшаларында көзделген жағдайларды қоспағанда, бір көзден сатып алу тәсілімен мемлекеттік сатып алуды келісудің тәртібін, сондай-ақ бұл жағдайларда өтініштерді қарау үшін қажетті құжаттардың тізбесін уәкілетті орган белгілейді.

5. Бір көзден мемлекеттік сатып алуды жүзеге асыру кезінде конкурстық комиссия сатып алу туралы хаттама жасауға міндетті, онда мынадай ақпараттар:

- 1) бір көзден мемлекеттік сатып алу әдісін қолданудың негіздемесі;
- 2) бір көзден сатып алынатын тауарлардың, жұмыстар мен көрсетілетін қызметтердің қысқаша сипаттамасы;
- 3) мемлекеттік сатып алу туралы шарт жасалатын өнім берушінің атауы мен орналасқан жері және осындай шарттың бағасы болуға тиіс.

Ескерту. 21-бапқа өзгеріс енгізілді - Қазақстан Республикасының 2004.07.05. N 569, 2004.07.09. N 587 Заңдарымен.

22-бап. Ашық тауар биржалары арқылы мемлекеттік сатып алу

Мемлекеттік сатып алу процесінде тек қана ашық тауар биржалары арқылы сатылуға тиісті биржалық тауарлар тізбесіне енгізілген тауарлар сатып алынатын жағдайда, мемлекеттік сатып алу Қазақстан Республикасының тауар биржалары туралы заңдарына сәйкес тауар биржаларында жүргізіледі.

Биржалық тауарлар тізбесіне енгізілген қандай да бір біртекті тауарларды мемлекеттік сатып алудың жылдық көлемі құны жағынан тиісті қаржы жылына арналған республикалық бюджет туралы заңда белгіленген айлық есептік көрсеткіштің төрт мың еселенген мөлшерінен, ал мемлекеттік бюджеттің, Қазақстан Республикасының Ұлттық Банкі бюджетінің қаражаты есебінен қамтылатын мемлекеттік органдар мен мемлекеттік мекемелер үшін тиісті қаржы жылына арналған республикалық бюджет туралы заңда белгіленген айлық есептік көрсеткіштің екі мың еселенген мөлшерден аспайтын болса, егер Қазақстан Республикасының тауар биржалары туралы заңдарында өзге ең төменгі көлем белгіленбесе, тапсырыс берушілер мемлекеттік сатып алуды жүзеге асырудың өзге тәсілін таңдауға құқылы.

Ескерту. 22-бап жаңа редакцияда - Қазақстан Республикасының 2004.07.05. N 569 Заңымен.

23-бап. Мемлекеттік сатып алу туралы шарт жасасу

1. Тапсырыс беруші конкурс жеңімпазы - ықтимал өнім берушіге хабарлай отырып, Қазақстан Республикасының заңдарына сәйкес типтік шарттың негізінде жасалған мемлекеттік сатып алу туралы шарттың жобасына қол қояды және оны оларға жібереді.

2. Конкурстың жеңімпазы оның конкурстық өтінімін жеңіп шықты деп тану

туралы хабарламаны және мемлекеттік сатып алу туралы шарттың жобасын алған кезден бастап бес жұмыс күні ішінде осы шартқа қол қоюға немесе тапсырыс берушіні келіспеушіліктер туралы немесе шартқа қол қоюдан бас тарту туралы жазбаша хабардар етуге міндетті.

3. Мемлекеттік сатып алу туралы шарт жасасудың мерзімі конкурс қорытындылары шығарылған күннен бастап күнтізбелік отыз күннен аспауға тиіс.

4. Мемлекеттік сатып алу туралы шарттың жобасына немесе қол қойылған мемлекеттік сатып алу туралы шартқа (бағасын төмендетуді қоспағанда) өнім берушіні таңдау үшін негіз болған ұсыныстың мазмұнын өзгертуі мүмкін қандай да бір өзгерістер және (немесе) жаңа талаптар енгізуге жол берілмейді.

Өнім берушіні таңдау үшін негіз болған сапа, көлем және басқа да талаптар өзгермейтін жағдайда мемлекеттік сатып алу туралы шарттың жобасына немесе қол қойылған мемлекеттік сатып алу туралы шартқа бағасын төмендету бөлігінде өзгерістер енгізуге жол беріледі.

Тапсырыс беруші мемлекеттік сатып алу туралы шартқа қол қойғанға дейін шарттың бағасын төмендету мақсатында ықтимал өнім берушімен келіссөздер жүргізуге құқылы. Бұл ретте ықтимал өнім беруші мұндай төмендетуге келіспеуге құқылы, ол тапсырыс берушіге тауарларды, жұмыстарды және көрсетілетін қызметтерді мемлекеттік сатып алу жөніндегі конкурстың жеңімпазы болып танылған ықтимал өнім берушімен жасалатын шартқа қол қоюдан жалтару құқығын бермейді.

Егер мемлекеттік сатып алу туралы шартты орындау барысында сатып алынатын ұқсас тауарлардың, жұмыстардың және көрсетілетін қызметтердің бағалары төмендеу жағына өзгерген жағдайда, осы тармақта көзделген ережелер ескеріле отырып, тапсырыс беруші мен ықтимал өнім берушінің екі жақты келісімі бойынша мемлекеттік сатып алу туралы шартқа тиісті өзгерістер енгізілуі мүмкін.

5. Тапсырыс беруші өнім берушіден мемлекеттік сатып алу туралы шарттың орындалуын қамтамасыз етуді енгізуді талап етуге құқылы және өнім беруші бұл қамтамасыз етуді ол конкурстық құжаттамада көзделген жағдайда ғана Қазақстан Республикасының Үкіметі белгілеген мөлшерде және тәртіппен енгізуге міндетті.

6. Мемлекеттік сатып алу туралы шартта тараптардың оны орындамағаны немесе тиісінше орындамағаны үшін айыппұл санкциялары көзделуге тиіс.

Ескерту. 23-бапқа өзгеріс енгізілді - Қазақстан Республикасының 2004.07.05. N 569 Заңымен.

4-тарау. АРНАУЛЫ ЕРЕЖЕЛЕР

24-бап. Қорғаныс, құқықтық тәртіп және ұлттық қауіпсіздік қажеттерін қамтамасыз етуге арналған мемлекеттік сатып алудың ерекше талаптары

Мемлекеттік сатып алу процесі үшін құпиялылық режимін сақтауды, сондай-ақ Қазақстан Республикасының ұлттық қауіпсіздігі мен қорғаныс қабілетінің кепілдігін қамтамасыз ететін ерекше тәртіп белгілеу талап етілетін жағдайларды қоспағанда, қорғаныс, құқықтық тәртіп және ұлттық қауіпсіздік қажеттерін қамтамасыз ету үшін мемлекеттік сатып алу осы Заңға сәйкес жүргізіледі. Осындай сатып алуды жүргізудің ерекше тәртібін Қазақстан Республикасының Үкіметі белгілейді.

24-1-бап. Мемлекеттік меншікке билік етуге уәкілетті мемлекеттік органның көрсетілетін қызметтерді сатып алуының ерекше талаптары

Активтерді басқарудың тиімділігіне талдау жүргізу, жекешелендіру объектілерінің құнын және олардың қаржылық жай-күйін бағалау жөніндегі қызметтерді мемлекеттік сатып алу, инвестициялық міндеттемелерді орындау Қазақстан Республикасының Үкіметі айқындайтын ерекше тәртіппен жүргізіледі.

Ескерту. 24-1-баппен толықтырылды - Қазақстан Республикасының 2004.07.05. N 569 Заңымен .

25-бап. Жеке адамдар үшін мемлекет кепілдік берген көрсетілетін қызметтерді сатып алудың ерекше талаптары

Қазақстан Республикасының заң актілерінде және Қазақстан Республикасы Үкіметінің актілерінде мемлекет кепілдік берген қызметтер көрсетушіні таңдау құқығы тікелей жеке адамға берілген жағдайда, Қазақстан Республикасының Үкіметі белгілейтін тәртіппен белгіленген баға (тарифтер) бойынша жеке адам таңдаған өнім берушіден осы қызметтерді мемлекеттік сатып алуды тапсырыс беруші жүзеге асырады.

25-1-бап. Ақпараттық жүйелерді пайдалана отырып мемлекеттік сатып алуды жүзеге асыру

1. Ақпараттық жүйелерді пайдалана отырып тауарларды, жұмыстарды және көрсетілетін қызметтерді мемлекеттік сатып алу арнайы тәртіппен жүзеге асырылады. Мемлекеттік сатып алу процесін жүзеге асырудың арнайы тәртібін, ақпараттық жүйеге жол берудің ерекшелігін, номенклатураны, көлемдерді және мемлекеттік сатып алу процесін қамтамасыз ету үшін құрылған ақпараттық жүйелер арқылы тауарларды, жұмыстарды және көрсетілетін қызметтерді мемлекеттік сатып алуды жүзеге асыруға міндетті тапсырыс берушілерді

Қазақстан Республикасының Үкіметі белгілейді.

2. Мемлекеттік сатып алу процесін қамтамасыз ету үшін құрылатын ақпараттық жүйелер саласындағы шаруашылық жүргізуді жүзеге асыру мемлекеттік монополия болып табылады.

Ескерту. 25-1-баппен толықтырылды - Қазақстан Республикасының 2004.07.05. N 569 Заңымен .

26-бап. Отандық тауар өндірушілерді қорғау талаптары

1. Отандық тауар өндіруші - ықтимал өнім берушілердің жеңіп шыққан конкурстық өтінімді анықтау кезінде басымдығы болады, оның тәртібі мен талаптарын Қазақстан Республикасының Үкіметі белгілейді.

2. Отандық тауар өндіруші - ықтимал өнім берушілерге басымдық беру талабы конкурстық құжаттамада көзделуге тиіс.

3. Егер мемлекеттік сатып алудың нысанасы Қазақстан Республикасының аумағында орындалатын (көрсетілетін) жұмыстар (қызметтер) болса, тапсырыс беруші отандық (қазақстандық) шикізат пен материалдарды, жергілікті (қазақстандық) еңбек және өндіріс ресурстарын пайдалана отырып, жұмыстар орындауды (қызметтер көрсетуді) талап етуге құқылы. Мұндай талап конкурстық құжаттамада көзделуге тиіс.

27-бап. Мемлекеттік сатып алуды жүзеге асыру кезінде шағын кәсіпкерлік субъектілері мен мүгедектердің қоғамдық бірлестіктері ұйымдарын қолдау

1. Мемлекеттік сатып алу жөніндегі конкурсты ұйымдастыру кезінде конкурсты ұйымдастырушы тауарлардың, жұмыстар мен көрсетілетін қызметтердің жекелеген түрлерін шағын кәсіпкерлік субъектілерінен және (немесе) тауарлар өндіретін, жұмыстар орындап, қызметтер көрсететін, Қазақстан Республикасы мүгедектерінің қоғамдық бірлестіктері құратын ұйымдардан сатып алуды жүзеге асыруға міндетті.

Бұл орайда мүгедектердің қоғамдық бірлестіктерінің аталған ұйымдарындағы мүгедектер саны қызметкерлердің жалпы санының елу бір процентінен кем болмауға тиіс.

1-1. Осы баптың 1-тармағында белгіленген ережелерді іске асыру үшін конкурсты ұйымдастырушы тек қана шағын кәсіпкерлік субъектілері және (немесе) мүгедектердің қоғамдық бірлестіктері құрған тауарлар өндіруші, жұмыстар орындаушы және қызметтер көрсетуші ұйымдар қатыстырылатын конкурстық өткізеді.

Шағын кәсіпкерлік субъектілерінен және (немесе) мүгедектердің қоғамдық бірлестіктері құрған тауарлар өндіруші, жұмыстар орындаушы және қызметтер көрсетуші ұйымдардан тауарларды, жұмыстарды және көрсетілетін қызметтерді

мемлекеттік сатып алуды жүзеге асыру кезінде олардың арасынан өнім берушіні таңдау, егер осы бапта өзгеше көзделмесе, осы Заңның 2-тарауында көзделген ережелерге сәйкес жүзеге асырылады.

Осы Заңның 16-бабында көзделген негіздер бойынша мемлекеттік сатып алу жөніндегі конкурс өтпей қалды деп танылған жағдайда конкурсты ұйымдастырушы осы Заңның 16-бабының 5-тармағына сәйкес жалпы негіздерде конкурсты қайтадан өткізуге құқылы.

2. Шағын кәсіпкерлік субъектілерінен және мүгедектердің қоғамдық бірлестіктерінің аталған ұйымдарынан сатып алынатын тауарлардың, жұмыстар мен көрсетілетін қызметтердің номенклатурасы және олардың көлемін (процентпен көрсеткенде) Қазақстан Республикасының Үкіметі жыл сайын белгілеп отырады.

3. Шағын кәсіпкерлік субъектілерінен және Қазақстан Республикасы мүгедектері қоғамдық бірлестіктерінің сол ұйымдарынан конкурстық өтінімдер түспеген жағдайда, конкурсты ұйымдастырушы сатып алуды Қазақстан Республикасының заңдарында көзделген тәртіппен жалпы негізде жүзеге асыруға құқылы.

Ескерту. 27-бапқа өзгеріс енгізілді - Қазақстан Республикасының 2004.07.05. N 569 Заңымен.

27-1-бап. Сатып алынуы мемлекеттік сатып алу нысанасы болып табылмайтын тауарлар, жұмыстар мен көрсетілетін қызметтер

1. Мыналар:

1) жергілікті атқарушы органдар ұйымдастыратын қоғамдық жұмыстар;
2) жалақы, жәрдемақылар, іссапар шығыстары және Қазақстан Республикасының заңдарында көзделген бюджетке төленетін басқа да міндетті төлемдер;

3) ғылым, әдебиет және өнер туындыларының авторларына төленетін авторлық сыйақы;

4) мемлекеттік сатып алу жөніндегі конкурстың жеңімпаздары болып белгіленген акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындар, заңды тұлғалар немесе олармен аффилиирленген заңды тұлғалар жүзеге асыратын, осы конкурстың нәтижесінде белгіленген өздерінің шарттық міндеттемелерін орындауға қажетті тауарларды, жұмыстарды және көрсетілетін қызметтерді сатып алу;

5) өкілдік шығыстар (өзара ынтымақтастықты орнату немесе қолдау мақсатында жүргізілетін ресми қабылдауларды өткізу, сондай-ақ басқарманың, Қазақстан Республикасының Ұлттық Банкі бюджетінің қаражаты есебінен

камтылатын органдардың, директорлар кеңесінің, тексеру комиссиясының отырысына қатысушыларды ресми қарсы алу және акционерлер жиналысын өткізуге арналған, келіссөздер кезінде оларды көлікпен қамтамасыз ету, буфет (фуршет) қызметін көрсету жөніндегі, ұйымның штатында тұрмайтын аудармашылардың қызметіне ақы төлеу жөніндегі шығыстар);

б) көрмелерге, семинарларға, конференцияларға, кеңестерге қатысуға қажетті шығыстар, сондай-ақ көрмелердің, семинарлардың, конференциялардың, кеңестердің материалдарын сатып алу, мерзімді баспасөз басылымдарын сатып алу ;

7) қызметкерлерді шет елдерде даярлау, қайта даярлау және біліктілігін арттыру ;

8) кепіл, кепілдік және қаржылық қызметтерді тарту туралы шарттар бойынша міндеттемені орындауды қамтамасыз етудің басқа да тәсілдері;

8-1) мүлікті лизингтік қызметті жүзеге асыру шеңберінде лизингке беру мақсатымен сатып алу .

9) лизингке беру, факторинг, франчайзинг, комиссия шарты бойынша сыйақы төлеу, сенімгерлік басқару, бюджет қаражатынан төлем жасау бөлігінде тікелей субсидия алушыға субсидия беру ;

10) рейтингтік агенттіктер көрсететін қызметтерді сатып алу, қаржылық қызметтер (сақтандыру қызметтерін, сондай-ақ табиғи монополия субъектілерінің қаржылық қызметтерді тартуын қоспағанда);

11) мемлекеттер, мемлекеттердің үкіметтері, халықаралық және мемлекеттік ұйымдар, қызметтері қайырымдылық және халықаралық сипаттағы шетелдік үкіметтік емес қоғамдық ұйымдар мен қорлар Қазақстан Республикасының Үкіметіне белгілі бір мақсаттарға (міндеттерге) жету үшін өтеусіз негізде ұсынатын гранттар қаражатын, сондай-ақ оларды беру туралы келісімде тауарларды, жұмыстар мен көрсетілетін қызметтерді сатып алудың өзге де рәсімдері көзделген жағдайларда осы гранттарды бірлесіп қаржыландыруға бөлінетін қаражатты жұмсау ;

12) мемлекеттік білім тапсырысы;

13) медициналық көмектің тегін кепілді көлемі;

14) саудаларға (аукциондарға) қатысуға байланысты шығыстар, мүлікті (активтерді) :

Қазақстан Республикасының атқарушылық іс жүргізу туралы заңдарына сәйкес сот орындаушылары жүргізетін;

Қазақстан Республикасының банкроттық туралы заңдарына сәйкес өткізілетін ;

Қазақстан Республикасының жер туралы заңдарына сәйкес өткізілетін; мемлекеттік мүлікті жекешелендіру кезіндегі;

Қазақстан Республикасының Үкіметі айқындайтын тізбе бойынша өткізілетін саудаларда (аукциондарда) сатып алу;

15) бағалы қағаздарды сатып алу;

16) Қазақстан Республикасы Ұлттық Банкінің монетарлық қызметі;

17) банкноттар мен монеталардың дизайны бойынша көрсетілетін қызметтер, Қазақстан Республикасының ұлттық валютасы - теңгені жасауға байланысты тауарлар, жұмыстар және көрсетілетін қызметтер;

18) Қазақстан Республикасы Ұлттық Банкінің Қазақстан Республикасының Ұлттық қорын сенімгерлік басқару жөніндегі қызметі;

19) Қазақстан Республикасының Ұлттық қорына сыртқы аудит жүргізу;

20) ұйымдардың жарғылық капиталына инвестициялар салуды жүзеге асыруға байланысты Қазақстан Республикасы Инвестициялық қорының қызметі, сондай-ақ осы ұйымдардың мұндай инвестициялау жүзеге асырылғанға дейін оларға осы Заңның күші қолданылмаған жағдайда тауарларды, жұмыстарды және көрсетілетін қызметтерді сатып алуы;

21) Қазақстан Республикасы Қылмыстық іс жүргізу кодексінің 72-бабына, Қазақстан Республикасы Азаматтық іс жүргізу кодексінің 114 және 304-баптарына, Қазақстан Республикасының Әкімшілік құқық бұзушылық туралы кодексінің 590-бабына және "Адвокаттық қызмет туралы" Қазақстан Республикасы Заңының 5-бабының 2-тармағына сәйкес (6-бапта көзделген жағдайларды қоспағанда) адвокаттар көрсететін заң көмегі үшін ақы төлеуден босатылған тұлғаларға көрсетілген заң көмегі үшін ақы төлеу және мұндай жағдайларда қорғау мен айыпталушының немесе сезіктінің тандау құқығы болмаған кезде қылмыстық істер бойынша адвокаттық қызмет көрсетілуіне байланысты шығыстарды өтеу;

22) жасалатын нотариаттық іс-әрекеттер үшін ақы төлеу;

23) мемлекеттік органдардың актілері негізінде жер учаскелерін беру үшін ақы төлеу;

24) акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындардың, заңды тұлғалардың және олармен аффилиирленген заңды тұлғалардың (табиғи монополиялар субъектілерін қоспағанда) Қазақстан Республикасының Үкіметі айқындайтын тізбе бойынша тауарларды кейіннен көтерме-бөлшек саудада өткізу мақсатында сатып алуы;

25) Қазақстан Республикасының сайлау туралы заңдарында көзделген тауарларды, жұмыстарды және көрсетілетін қызметтерді сатып алу;

26) мемлекеттік награлаларды, депутаттың омырауға тағатын белгісін, мемлекеттік сенім таңбаларын, Қазақстан Республикасы азаматтарының паспорттарын (оның ішінде қызметтік және дипломатиялық), Қазақстан

Республикасы азаматтарының жеке куәліктерін, шетелдіктің Қазақстан Республикасында тұруға ықтиярхатын, азаматтығы жоқ адамның куәлігін, акциздік маркаларды, мемлекеттік үлгідегі білім туралы құжаттарды әзірлеу ү ш і н а қ ы т ө л е у ;

27) статистикалық деректерді өңдеу жөніндегі қызметтерді сатып алу;

28) акцияларының (үлестерінің) елу және одан да көбірек проценті немесе акцияларының бақылау пакеті мемлекетке тиесілі мемлекеттік кәсіпорындардың, заңды тұлғалардың және олармен аффилиирленген заңды тұлғалардың инновациялық қызметті қаржыландыру жөніндегі шешімді қабылдау мақсатында инновацияларға тәуелсіз ғылыми-техникалық сараптама жүргізу жөніндегі қ ы з м е т т е р д і с а т ы п а л у ы ;

29) ұйымдардың Қазақстан Республикасының халықаралық келісімдеріне сәйкес жүзеге асырылатын қызметінің негізгі нысанасы бойынша тауарларды, жұмыстарды және көрсетілетін қызметтерді Қазақстан Республикасының Үкіметі айқындайтын тізбе бойынша сатып алуы;

30) жедел-ізвестіру қызметі міндеттерін жүзеге асыруға уәкілетті органдардың оларды орындау кезінде:

жедел-ізвестіру қызметін жүзеге асыратын органдарға құпия түрде жәрдемдесуге келісім берген адамдар көрсететін қызметтерді;

қызметтік үй-жайларды, көліктік және өзге де техникалық құралдарды, м ү л і к т і с а т ы п а л у ы ;

жасырын кәсіпорындар мен ұйымдар құруы; қажетті ғылыми-техникалық немесе өзге де арнаулы білімі бар лауазымды адамдар мен мамандар көрсететін қызметтерді сатып алуы;

31) Алматы қаласы өңірлік қаржы орталығының қызметін реттеу жөніндегі уәкілетті мемлекеттік органның Халықаралық кеңесі мүшелерінің қызметтерін қоса алғанда, Алматы қаласы өңірлік қаржы орталығының қызметін реттеу жөніндегі уәкілетті мемлекеттік органның консалтингтік қызметтер көрсетуді сатып алуы мемлекеттік сатып алу нысанасы болып табылмайды.

2. Осы баптың 1-тармағында көзделген сатып алуды жүзеге асыру кезінде тапсырыс берушілер осы Заңның 3-бабында белгіленген мемлекеттік сатып алу процесін құқықтық реттеу принциптерін басшылыққа алуға міндетті.

Ескерту. 27-1-баппен толықтырылды - Қазақстан Республикасының 2004.07.05. N 569 , өзгерту енгізілді - 2005.12.23. N 108 , 2006.06.05. N 146 , 2006.07.04. N 150 Заңдарымен.

5-тарау. ҚОРЫТЫНДЫ ЕРЕЖЕЛЕР

28-бап. Мемлекеттік сатып алу туралы шарттардың орындалуын бақылау

Мемлекеттік сатып алу туралы шарттардың орындалуын бақылауды Қазақстан Республикасының заңдарына сәйкес тапсырыс беруші жүзеге асырады

29-бап. Конкурсты ұйымдастырушының, тапсырыс берушінің және конкурстық комиссияның іс-әрекеттері мен шешімдеріне шағым жасау

1. Мемлекеттік сатып алу процесін жүргізу барысында Қазақстан Республикасының мемлекеттік сатып алу туралы заңдары бұзылған жағдайда, ықтимал өнім беруші мемлекеттік сатып алу процесінің өткізілуі барысында конкурсты ұйымдастырушының, тапсырыс берушінің немесе конкурстық комиссияның іс-әрекеті мен шешімдеріне Қазақстан Республикасының заңдарында белгіленген тәртіппен шағым жасауға құқылы. Бұл орайда мемлекеттік сатып алуды жүзеге асыру тәсілін таңдау шағым жасалу объектісі б о л м а й д ы .

2. Қазақстан Республикасының мемлекеттік сатып алу туралы заңдары бұзылған жағдайда, уәкілетті орган конкурсты ұйымдастырушының, тапсырыс берушінің немесе конкурстық комиссияның мемлекеттік сатып алу туралы шарт жасасуға дейінгі шешімдерін жарамсыз деп тануға және мемлекеттік сатып алу процесін тоқтатуға құқылы.

Бұл орайда, егер мемлекеттік сатып алу туралы шарт жасалып, күшіне енсе, уәкілетті орган осы мәмілені жарамсыз деп тану туралы талап қойып сотқа жүгінуге міндетті.

30-бап. Дауларды шешу

Мемлекеттік сатып алу процесінде туындайтын барлық даулар Қазақстан Республикасының заңдарына сәйкес шешіледі.

31-бап. Қазақстан Республикасының мемлекеттік сатып алу туралы заңдарын бұзғандық үшін жауапкершілік

Қазақстан Республикасының мемлекеттік сатып алу туралы заңдарының бұзылуына кінәлі тұлғалар Қазақстан Республикасының заңдарына сәйкес жауапты болады.

32-бап. Осы Заңды қолданысқа енгізу тәртібі

1. Осы Заң ресми жарияланған күнінен бастап қолданысқа енгізіледі.
2. "Мемлекеттік сатып алу туралы" 1997 жылғы 16 шілдедегі Қазақстан Республикасы Заңының (Қазақстан Республикасы Парламентінің Жаршысы, 1997 ж., N 17-18, 216-құжат; 1998 ж., N 23, 415-құжат; 1999 ж., N 23, 932-құжат) күші жойылды деп танылсын.

*Қазақстан Республикасының
Президенті*

© 2012. Қазақстан Республикасы Әділет министрлігінің «Қазақстан Республикасының Заңнама және құқықтық ақпарат институты» ШЖҚ РМК